

Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat (Isumaginninnermi malittarisassanik kommunit aqutsinerannik atorunnaarsitsineq)

§ 1

Inatsisartut isumaginnittoqarfiup aqunneqarneranut aaqqissuussaanelu peqqussutaani nr. 11, 12. november 2001-imeersumi makkunuuna allannguuteqartitsisoqassaaq:

1. § 7-ip kinguninnguatiqut qulequttamik nutaamik ikkussisoqassaaq:

"Isumaginninnermi malittarisassanik kommunit aqutsinerannik atorunnaarsitsineq"

2. Qulequttap kinguninngua imatut ikkussisoqassaaq:

" § 7a. Naalakkersuisut kommunit isumaginninnikkut maleruagqusat toqqammavigalugit ingerlatsinerannik atorunnaarsitsissallutik aalajangersinnaapput, tamatumani kommuni pineqartoq pisussaaffimminnik imaluunniit innuttaasut pisisinnaatitaaffinik annertuumik sumiginnaasimappat.

Imm. 2. Atorunnaarsitsinissaq pillugu aalajangerneq piffissamut siumut aalajangeriikkamut imaluunniit killiliinngikkaluarluni atuuttussatut aalajangerneqarsinnaavoq.

Imm. 3. Atorunnaarsitsinissamut aalajangernermi isumaginninnermut maleruagassat tamakkerlugit imaluunniit ilaannai pillugit tamatumanilu isumaginninnikkut maleruagassanut aalajangersimasunut tunngatinneqarsinnaapput.

§ 7b. § 7 a malillugu atorunnaarsitsinissaq pillugu aalajangernermi, Naalakkersuisut isumaginninnermi maleruagassat ataatsimoortut killissaliussaasa iluanni kommunalbestyrelsi saneqqunneqarsinnaanngitsunik pisussaaffilersinnaavaat isumaginninnikkut maleruagassat aalajangersimasumik periuseqarluni ingerlatsivigineqarnissanut aammalu suliassat aalajangiisarnerrillu assigiinngitsut qanoq isumagineqartarnissaanik aalajangersaanikkut.

Imm. 2. § 7 a malillugu atorunnaarsitsinissaq pillugu aalajangernermi, kommunalbestyrelsip isumaginninnikkut oqartussaaffii tamakkiisut ilaannakortulluunniit Naalakkersuisunit isumagisassanngortinneqarsinnaapput. Tamatuma saniatigut Naalakkersuisut isumaginninnikkut maleruagassat naapertorlugit suliassat tigullugillu aallartissinnaallugit.

Imm. 3. Kommunip isumaginninnermut maleruagassanik ataatsimoortunik ingerlatsivimmi aqutsineranik atorunnaarsitsinissaq pillugu aalajangiineq tunngavigalugu Naalakkersuisut isumaginninnermut maleruagassat ataatsimoortut naapertorlugit aalajangerneri, Isumaginninnermi

Naammagittaalliuteqartarfimmut naammagittaalliutigineqarsinnaapput. Naammagittaalliorneq, aalajangiineq kommunimit aalajangiunneqarsimappat maleruagassat atorineqarsimasussaagaluit malillugit, pissaaq.

§ 7c. § 7 a malillugu atorunnaarsitsinissaq pillugu aalajangernerup malitsigisaanik iliuitsit aammalu isumaginninnikkut maleruagassat toqqammavigalugit Naalakkersuisunit peqqussutigineqartut imaluunniit suliani aalajangersimasuni Naalakkersuisut aalajangiineri, sioqqutsisumik kommunimit aningaasaliisoqarsimanngikkaluarpalluunniit piviusunngortinniarneqarsinnaapput. Tamatumani kommunalbestyrelsi naak tunngavilersuiffigineqanngikkaluarlunuunniit pisussaaffilerneqarsinnaavoq aningaasanik atugassanik pissarsiorniarnissamut. Taamatullu pisoqartillugu Inatsisartut kommunit aqunneqarnerannut inatsisaani allaqqasut toqqammavigineqassapput.

§ 7d. Naalakkersuisut § 7 a malillugu atorunnaarsitsinissaq pillugu aalajangernerup malitsigisaanik ingerlatsinermut aningaasartuuteqarneranut kommunalbestyrelsi matussusiisassaaq.

Imm. 2. Kommunalborgstyrelsi pineqartumi sulisooreersut allaffeqarfigisaallu Naalakkersuisunit atugassiissutigissavai. Sulisut tamatumani ilanngullugit kommunini atorfilittut inissisimasut Naalakkersuisut najoqqutassiarisaat toqqammavigalugit atorunnaarsitsinermi pineqartut iluanni suliassaminnik isumaginnittussaataapput.

§ 7e. Kommunalborgstyrelsi pisussaavoq sulianut tunngatillugu paasissutissat suugaluartut il.il. Naalakkersuisunit piumasarineqartut ingerlateqqittassallugit. Naalakkersuisut kommunalborgstyrelsimut piumaffigineqarsinnaavoq allakkatigut nalunaarsueqqullugu.

Imm. 2. Imm. 1-imi taaneqartut toqqammavigalugit kommunip ingerlateqqitai, Naalakkersuisunit susassaqqanngitsunut ingerlateqqinneqarsinnaanngillat.

§ 7f. Naalakkersuisut pisinnaatitaapput kommunimi sulianik ingerlatsiviusunut sumiikkaluartunut tamanut isersinnaatitaanissaminut.

Imm. 2. Naalakkersuisut pisinnaatitaapput kommunip qarasaasiatigut sullissisarnerni atortorissaarutaannut aammalu taakkua imarisaannut suliallu uppersarsaataannut misissuisinnaatitaanissamut.

Imm. 3. Kommunip qarasaasiatigut sullissisarnerni atortorissaarutaannut Naalakkersuisut isersinnaatitaanissaminni kommunip pisinnaatitaaffii naapertorlugit isersinnaatitaassapput.

§ 7g. Naalakkersuisut atorunnaarsitsinissaq pillugu aalajangernerat Isumaginninnermut Naammagittaalliuteqartarfimmut allatigulluunniit ingerlatsinikkut oqartussaaffimmut ingerlateqqinneqarsinnaanngilaq.”

§ 2.

Inatsisartut inatsisaat ulloq 1. juuli 2016-imiit atuutilersinneqarpoq.

Namminersorlutik Oqartussat, ulloq 6. juni 2016

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut